



NAKON ŠTO JE UHAPŠEN POMOĆNIK MINISTRA PRAVDE FBiH

# Hidajet Trako prihvatio zabranu obavljanja funkcije

M. RENER-SMAJUVIC

SARAJEVO - Hidajet Trako, pomoćnik federalnog ministra pravde, osumnjičen za ometanje rada pravosuđa i zloupotrebu položaja, složio se sa mjerama zabrane obavljanja službenih aktivnosti i sastajanja sa ostalim osumnjičenim, nakon što je uhapšen te saslušan i pušten u subotu kasno uveče.

U Sudu BiH su nam kazali da bi mjere zabrane za Traku, koje je juče uputilo Tužilaštvo BiH, Sud BiH mogao razmatrati danas.

Kemo Kapur, Trakin advokat, juče je istakao da će biti još osumnjičenih "krupnijih riba", te da je njegov branjenik samo kolateralna šteta.

Traku, koji je pomoćnik ministra za izvršenje kaznenih sankcija, uhapsili su pripadnici SIPA po nalogu Tužilaštva BiH koje ga sumnjiči da je nedozvoljeno premjestio zaštićenog svjedoka Tužilaštva iz jednog u drugi kazneno-popravnii zavod u koji nikako nije smio biti premješten zbog ugroženosti sigurnosti i života svjedoka.

Pravosudne i policijske agencije bile su izričite da zaštićeni svjedok ne smije ni pod kojim uslovima biti premješten u taj drugi KPZ, pa Traku sumnjiče da



Hidajet Trako

**"KRUPNE RIBE"  
Biće osumnjičeno još  
"krupnih riba", moj  
branjenik je samo  
kolateralna šteta,  
kazao Kapur**

je ugrozio sigurnost i život svjedoka kao i istragu i predmet Tužilaštva BiH. Riječ je o predmetu protiv Darka Eleza i drugih.

Iz Tužilaštva BiH juče nismo uspjeli dobiti više informacija o osumnjičenim za ometanje pravosuđa i eventualnim novim hapšenjima. Ni Kristina Jozić, portparol SIPA, nije mogla reći ništa više o ovom predmetu osim

da je u subotu saslušan veliki broj svjedoka iz Ministarstva pravde FBiH i kazneno-popravnih zavoda u Sarajevu i Zenici.

Zoran Mikulić, ministar pravde FBiH, u subotu je izjavio da nisu sasvim jasni zakonski razlozi za Trakino hapšenje te da država zakonit rad svih istražnih i pravosudnih organa svjestan činjenice da pojedinci u policiji i tužilaštvima ne rade uvijek u pravcu zaštite zakonitosti.

Inače, u avgustu ove godine podignuta je optužnica protiv oko 30 osoba u predmetu "Darko Elez i drugi", koje terete za više ubistava i teških ubistava, oružanih pljački banaka, pranje novca i druga teška krivična djela.